

Public Prayers in Chi-Mpoto.

First Edition.



Printed and Published by the
UNIVERSITIES' MISSION PRESS.

LIKOMA.

SALA YA KUMANYIKA NI WANDU WOHA.

1. Sala la Ambuya.

Atati witu, ayii Kunani, Lihina linu lihulalike. Uwambo winu uhike. Hila mupala hitendeke, mundima ngati Kunani. Mutipikihe lalino chiliwi cha lyuwa. Ni mutilekelele hyakuhoka hitu, ngati tenga tiwalekelela awo watihokela. Ni mukatitolela paku-geheka; Nipa mutikengelele pa hihakahu: Magambo uwambo, ni hikakala, ni kukuhika, kuyii kwinu hyaka hyangakuyomoka. Amen.

2. Akuhike Atati.

Akuhike Atati, ni Mwana ni Roho Mhuhu. Omo kwatamile pakutumbulila, hiho ni hino, ni chitami-ngani; hyaka hyangakuyomoka. Amen.

3. Liyitikilo Iya Akapostolo.

Ninjitikila Mlungu Atati, Mwene hikakala hyakape, Wakupanga Kunani ni ndima.

Ni Yesu Kristo, Mwana wake wakayika Ambuya witu, Oyo atolike ndumbo ni Roho Mhuhu, Aweleki-ke ni Mariamu Virgin, Ang'ahike chikahi cha Pontio Pilato, Atachambulike pa msalaba, ahwile, awikike mtengele, Ahelile pa utamo wa mahoka; Lyuwa Iya katatu ahyukite pa wakuhwa, Akwelite kunani, Ni atama pahi pa chiwoko cha malililo cha Mlungu Atati, mwene hikakala hyakape; Kuhuma kuko, hakahike, kuwatemula wakulama ni wakuhwa.

Ninjitikila Roho Mhuhu; Church Lihuhu, ni Katoliko; Kuhanganikana kwa Wahunu; Kulekeleka zambi; kuhyuka kwa higa, ni kulama kwa hyaka. Amen.

4. Kukumbula zambi

Tihumbula kwa Mlungu, mwene hikakala hyakape, Atati, ni Mwana, ni Roho Mhuhu, ni pa miho ya liwanja loha lya Kunani, kuti tahokite muni, pa kuhola, pa kupwaga, ni pa kutenda, kuhoka kwitu kwene, kuhoka kwitu kutopela muni. Momo tindu-wa Mlungu, mwene hikakala hyakape, Atati, ni Mwana, ni Roho Mhuhu, atikolele chiha. Amen.

Sala ya pa Malaulau.

✠ Pa Lihina lya Atati, ni lya Mwana, ni lya Roho Mhuhu. Amen.

Atati witu, ayii Kunani.....

Ÿ. Ambuya, muwopole milomo yitu.

R. Ni pandomo pitu hakipandumbe.

Ÿ. Mlungu, mkakawikiha kutikengelela.

R. Ambuya, myumbatike kutiyangatila.

Ÿ. Akuhike Atati, ni Mwana, ni Roho Mhuhu :

R. Omo kwatamile pakutumbulila, hiho ni hino, ni chitamingani hyaka hyangakuyomoka. Amen.

Ÿ. Mundumbaye Ambuya.

R. Lihina lya Ambuya lilumbike.

VENITE.

MWICHAYE, tinjimbile Ambuya :

Tihekelele kwa Uliwu wakutilamiha.

2 Tiyendaye pa miho yake ni kumchengula :

Timlulutile ni Zaburi.

- 3 Magambo Ambuya ni Mlungu nkulungwa :
Bambo nkulungwa kupitikiha akanlungu wakape.
- 4 Pa mawoko gake pakunyoleka pa ndima :
Hihongwa hya hitumbi kawili ni hyake.
- 5 Luchi ni lwake, alupangite :
Mawoko gake gaumbite ndima uyumu.
- 6 Tiyendaye, timbwilichimbo, tiyiname :
Tichikame pa miho ya Ambuya wakutipanga
- 7 Magambo yombe Mlungu witu :
Ni tenga lukolo lwa pakulilila pake, ni mang'ohi
ga chiwoko chake.
- 8 Lalino, mukayuwani le lilowe lyake, mukalimbiha.
mitima yinu :
Ngati pa Meribah, ngati lyuwa lya Massah pa
mapululu.
- 9 Apa akatati winu wanigehite :
Wanigehite ni moto, walolite echo natendite
- 10 Hyaka makumi mcheche nahyomite ni chiweleko
echi ni nayegiye :
Lukolo lwakuhoka pa miyo yao, lwangakuma-
nya milima yangu.
- 11 Wiwila nalapile pa kuhyoma kwangu :
Ngakuyingila awa pa kupituli kwangu.

Akuhike Atati.....

Zaburi.

Somo lya Kutumbula.

TE DEUM LAUDAMUS

TINDUMBA MWENGA MLUNGU : tinjitikila Mwenga Ambuya.

Mwenga Atati wa hyaka hyoha : milima yoha yinjinika.

Mwenga Akamalaika woha wankuhila : Mwenga Kunani ni makakala goha momo.

Mwenga Akerubu ni Aserafi : wankuhila wangakukotoka.

Mhuhu, Mhuhu, Mhuhu : Ambuya Mlungu wa mawanja.

Konani ni milima itwilila Ukulungwa : wa kukuhika kwinu.

Wandumba Mwenga : liwanja lya kukuhika lya Akapostolo.

Wandumba Mwenga : Wakulota kawalangiko kake kulumbika.

Wandumba Mwenga : Liwanja lya Akamboni wakuwata hyakuhila.

Mwenga wa ndima woha : Church lihuhi linjitikila.

Mwenga Atati : mwene Ukulungwa wanga mipaka.

Mwana winu wakayika : wa chakaka, ni wakuyinika.

Ni Roho Mhuhu : Wakuyimalila.

Mwenga Kristo : Bambo wa kukuhika.

Mwenga wa Atati : mwana wa hyaka hyoha.

Apa mwalitole chitohi cha wandu, nahuli kuwakengelela : ngakukangacha ni ndumbo yake Virgin.

Mwenga, apa mwahotwile kuwawa kwa nyihwa : mwahugulile Uwanbo wa Kunani, kwa wandu wene liyitikilo.

Mwenga, mutama pa chiwoko cha malililo cha Mlungu : pa kukuhika kwake Atati.

Tinjitikila Mwenga : hakimuhike kwa kutitemula :
Momo tenga tinduwa muwayangati'e wa mnyumba mwinu : awa mwakombwile ni mwahi winu : wa ulohi ukulungwa.

Mwapikihe wapate papamo ni wahuhu winu :
kukuhika kwa hyaka hyangakuyomoka.

Ambuya, mulukengelele lukolo lwinu : muwapikihe
wala wa wingila winu chihomo.

Muwalongohe : ni kuwatunduwiha kwa hyaka hyangakuyomoka.

Lyuwa ni lyuwa : tindumbalila.

Tililumba Lihina linu : hino ni hyaka hyakape.

Mutipikihe Ambuya, lyuwa lya lalino : tigohike
tikatenda zambi.

Mutikolele chiha Ambuya : mutikolele tenga chiha.

Chiha chinu, Ambuya, chitihikile : omo tenga
timhuwalila Mwenga.

Nimhuwalila Mwenga Ambuya : hyaka hyangakuyomoka nikayihilika honi.

Somo lyakawili.

BENEDICTUS. Luka I. 68.

Alumbalike Ambuya Mlungu wa Israel : magambo
alolalile lukolo lwake ni alukombwile.

Ayimike linyelo lya ukengelelo kwa tenga : pa
nyumba ya mkombo wake David.

Omo ayegiye pandomo pa Wakulota wake wahuhu :
awo wayii chitumbulile kuupanga ndiwa.

Ukengelelo pa walugu witu : ni pa mawoko ga woha wakutihakalila.

Kutenda chiha kwa akatati witu : ni kukumbukila
malangano gake mahuhu.

Kulapa kula andapilile atati witu Abrahamu: kutipikiha tenga.

Tikapokonyoke pa chiwoko cha walugu witu: tintumakile panga woga.

Pa uhuhu ni lukwali pa miho yake: machuwa goha ga kulama kwitu.

Ena, Mwenga mwana, hakimluhike Wakulota wa oyo wa Kunani kwene: magambo kahimlongolele pa miho ya Ambuya, kuwikingani ndila hyake.

Kumanyiha lukolo lwake ukengelelo: pa kulekelela zambi zao.

Kwa moyo wa chiha wa Mlungu witu: pa uro chiwumbu kuhuma panani, hakichitolele tenga.

Kuwamulikila awo wakatama pa lwihhi, ni pa chihilu cha nyihwa: ni kulongoha malwayo gitu pa ndila ya kuliyeka.

Akuhike Atati

LIYITIKILO.

Ŷ. Ambuya atame ni mwenga.

Ŷ. Atame ni roho winu.

Tiluwe

Ambuya, mutikolele chiha.

Kristo mutikolele chiha.

Ambuya, mutikolele chiha.

Atati witu.....Nambo mutikengelele pa hihakahu
Amen.

- W. Mutilangihe, Ambuya, chiha chinu.
 R. Mutipikihe ukengelelo winu.
 W. Ambuya, mgohe Bambo.
 R. Mutiyuwanile kwa chiha, apa tinkemela.
 W. Muwahwatike Wakulindalila winu ni lukwali.
 R. Muwakinihe wakupigulika winu.
 W. Muligohe lukolo lwinu, Ambuya.
 R. Muwapikihe wa wingila winu chihomo.
 W. Mupeleke kuliyeka Ambuya, pa machuwa gitu.
 R. Magambo pakutupu yungi wakutiyimalila pa ngondo, yika Mwenga Mlungu.
 W. Mlungu, mutitende mioyo yitu yakugululika.
 R. Ni Roho winu Mhuhu mkatiwuhila.

1. Liluwo lya lyuwa lyake

2. Liluwo lya kuliyeka

Mlungu, wakutumbuha kuliyeka ni wakutogolela kuyangulana, kwa kumanya Mwenga kuyii kulama kwitu kwa hyaka, ni kumhengela kuyii uweneke munimuni; mutiyepela tenga wakulibeleha winu pa awo wakukomana natu; nipa tenga, pa kuhuwalila kuyepela kwinu, tikayogopa hikakala hya ndugu yii yoha; kwa hikakala hya Yesu Kristo Ambuya witu. Amen.

3. Liluwo lya nema

Ambuya, Atati witu wa Kunani, Mlungu mwene hikakala hyakape, ni wa hyaka hyangakuyomoka, mwatihindikile panga hihakahu mpaka kutumbula kwake lyuwa lya lalino: mutiyepela momo ni hikakala hinu hikulungwa, nipa mutikolele lalino tikatye lambuka pa zambi iyi yoha, tikautukila pa upandu

uyi woha, ni pa hyoha tihitenda mutilongoho mawene, tihitende hila hya lukwali pa miho yinu chitendile; kwa Yesu Kristo Ambuya witu. Amen.

II Korintho xiii.

Nena ya Ambuya witu Yesu Kristo, ni kutogolela kwake Mlungu, kuhanganikana kwa Roho Mhuhu, kutame ni tenga tawoha kwa hyaka hyangakuyomoka. Amen.

Sala ya pa Kamihi.

✠Pa Lihina Iya Atati, ni Iya Mwana, ni Iya Roho, Mhuhu, Amen.

Tihumbula kwa Mlungu.....

Atati witu.....

V. Ambuya, muwopole milomo yitu.

R. Ni pandomo pitu hakipandumbi.

V. Mlungu, mkakawikiha kutikengelela

R. Ambuya, myumbatike kutiyangatila.

V. Akuhike Atati, ni Mwana, ni Roho Mhuhu:

R. Omo kwatamile pakutumbulila hiho ni hino, ni chitamangani: hyaka hyangakuyomoka. Amen.

V. Mdumbaye Ambuya.

R. Lihina Iya Ambuya lilumbike.

Zaburi yimo

Somo Iya kutumbula

MAGNIFICAT Luka I. 46

UMI wangu unkuhiha Ambuya: roho wangu wahekelele muni pa Mlungu Nkengelelo wangu.

Magambo aulolite: uchoko wa mbanda wake.

Magambo lola, chitumbulii lalino: hiweleko hyoha hakihingeme mwene chihomo.

Magambo Yombe mwene hikakala andendile yakulungwa: ni Lihina Iyake Iyiii pa yika.

Ni chihwa chake chiyii mpaka hiweleko ni hiweleko: kwa awo wakantila.

Atendite makakala kwa chiwoko chake: awapalagine wakulikwiha, pa maholalelo ga mioyo yao.

Awawuhite wene hikakala pa hitihu hyao: awatunduwihe awo wayii pahi.

Awatupihe ni hinyahi wakuwona njala : awapikihe mwanja wene chuma mawoko matupu.

Anjangatile Israel kombo wake, kunkumbukila Abraham ni mbeyu yake ya hyaka chiha : omo apwagile ni akatati witu.

Akuhike Atati. Amen

Somo Iya kawili.

NUNC DIMITTIS. Luka II. 29

Hino mundaube mbanda winu Ambuya : omo mwapwagwile, pa kuliyeka.

Magambo miho yangu : yalolite ukengelelo winu.

Ula mwawikingani : pa miho ya mihuku yoha.

Lilangalila kuyikulila mihuku : ni kukuhika kwa lukolo lwinu Israel.

Akuhike Atati. Amen.

Liyitikilo Iya Akapostolo

V. Ambuya atame ni mwenga.

R. Atame ni roho winu.

Tiluwe

Ambuya, mutikolele chiha.

Kristo, mutikolele chiha.

Ambuya, mutikolele chiha.

Atati witu. Nambo mutikengelele pa hihakahu.
Amen.

V. Mutilangihe, Ambuya, chiha chinu.

R. Mutipikihe ukengelelo winu.

V. Ambuya, mgohe Bambo.

R. Mutiyuwanile kwa chiha, apa tinkemela.

- V. Muwahwatike Wakulindalila winu ni lukwali.
 R. Muwakinihe wakupigulika winu.
 V. Muligohe lukolo lwinu, Ambuya.
 R. Muwapikihe wa wingila winu chihomo.
 V. Mupeleke kuliyea Ambuya, pa machuwa gitu.
 R. Magambo pakutupu yungi wakutiyimalila
 ngondo, yika Mwenga Mlungu.
 V. Mlungu, mutitende mioyo yitu yakugululika
 R. Ni Roho winu Mhuhu mkatiwuhila.

1. Liluwo lya lyuwa

2. Liluwo lya kawili

MLUNGU, kuhuma kwinu hyakupalika hyoha hyakuhulila, ni malango goha manyahi, ni mahengo goha ga lukwali; Muwapikihe wawanda winu kuliyea kula ndima uni ngakuhotola kupeleka; kuti mioyo yitu yiyendengani kuyuwanila mahamri ginu, ni kawili nantiyepela pa woga wa walugu witu, titamingani kupumulila ni panga magambo; kwa kuyanila kwake Yesu Kristo Nkengelelo witu.

Amen.

3. Liluwo lya katatu

MUMULIKE timpembeha Ambuya, pa lwihi lwitu; ni mtigohe kwa chiha chinu chikulungwa pa ulugu ni hipandu hyakape hya kilo uni; kwa kuto-golela kwake Mwana winu wakayika, Nkengelelo witu Yesu Kristo. Amen.

Liluwo Iya Krusostomo Mhuhu

Mlungu, mwenye hikakala hyoha, mwatipikihe nema chikahi echi kutenda ni moyo umo mapembebo gitu gakuhanikanika pa miho yinu; ni mwalangite kuti wawili pangi watatu ana wakokine pa Lihina linu hakimwapikihe hila wapala: Myomole hino, Ambuya, hila wapala ni hila waluwa wawanda winu, omo hakiwanyambihe muni; kutikolela pa hyaka ihyi timanye hyachakaka hino, ni pa hyaka hakihihike kulama kwa hyaka hyangakuyomoka. Amen.

II Korintho xiii.

Nema ya Ambuya witu Yesu Kristo, ni kutogolela kwake Mlungu, ni kuhanikanika kwa Roho Mhuhu, kutame ni tenga tawoha kwa hyaka hyangakuyomoka. Amen.

LITANIA.

Mlungu Atati wa Kunani; mutikolele chiha tenga wene zambi.

Mlungu Atati wa Kunani; mutikolele chiha tenga wene zambi.

Mlungu Mwana, Wakukombola ndima; mutikolele chiha, tenga wene zambi.

Mlungu Mwana, Wakukombola ndima; mutikolele chiha, tenga wene zambi.

Mlungu Roho Mhuhu, Wakupita mwa Atati ni Mwana; mutikolele chiha, tenga wene zambi.

Mlungu Roho Mhuhu, Wakupita mwa Atati ni Mwana; mutikolele chiha, tenga wene zambi.

Utatu Uhuhu, Mweni chihomo, Wakulumbalika, Akanawene watatu pa Mlungu yumo; mutikolele chiha, tenga wene zambi.

Utatu Uhuhu, Mweni chihomo, Wakulumbalika, Akanawene watatu pa Mlungu yumo; mutikolele chiha, tenga wene zambi.

Mkakumbukila Ambuya hyakuhoka hitu, nakayii hya akatati witu, ni mkatiipilila pa zambi hitu; mutilekelele Ambuya, tenga wa lukolo lwinu, awo mwakombwile ni mwaki winu wa ulohi ukulungwa, ni mkahyoma ni tenga hyaka hyoha

Ambuya mnyahi, mutilekelele.

Pa hihakahu hyoha ni malindi; pa zambi ni kuchenjela kwake Shetani; pa kuhyoma kwinu ni kutagika chitagikingani.

Ambuya mnyahi, mutikengelele.

Pakukoyoka miho pa ntima ni chinyundu; pa kulilumbalila ni kulihiligana; pa kutukuhla ni kuha-kalila, ni pa kukepa koha pa kutogolelana.

Ambuya mnyahi, mutikengelele.

Pa ukeme ni zambi hyoha hyakutikoma ; pa hya kutikonga hyoha hya ndima, hya higa, ni hya Shetani.

Ambuya mnyahi, mutikengelele.

Pakutihulahuta mbamba ni chimpunga ; pa hikoko ni kuhwa kwa ntimbo winu ; pa chimpetupetu ni chilala ; pa ngondo, kuhinikalila, ni kuhwa kwa chikenyumukile.

Ambuya mnyahi, mutikengelele.

Pakupatuka ni Bambo ni kukokana pa nkondo ; pa maluwiko ga upuhe ni kulipatula ; pa kuyumika muntima, ni pa kuyuyuha Lilowe ni Hamri yinu.

Ambuya mnyahi, mutikengelele.

Kwa kutendeka mundu Mwenga ; kwa kuwelekeka kwinu kuhuhu ni kusilimuka ; kwa Ubatizo winu, kuhinola chiliwi, ni kugeheka.

Ambuya mnyahi, mutikengelele.

Kwa mang'ahiko ginu ni lihuki lila la mwahi ; kwa msalaba winu ni kuyuwana mahauko ; kwa kuhwa kwinu kwene ulobi, ni kuwikika pa tengele ; kwa kuhuka kwinu kwene kukuhika, ni kukwela Kuna ; ni pakuhika kwake Roho Mhuhu.

Ambuya mnyahi, mutikengelele.

Pa chikahi choha cha kuhauka kwitu, ni pa kutalamakiha kwitu ; pa saa ya kuhwa, ni pa lyuwa lya kutemula.

Ambuya mnyahi, mutikengelele.

TENGA wene zambi timpembelela kutiyuwanila Ambuya Mlungu ; Muyitikile kulilinganiha ni kuli-golola Church linu lihuhu ni Katoliko, pa ndila yakugololoka.

Ambuya mnyahi, timpembelela kutiyuwanila.

Muyitikile kumgoha, ni kumlimbiha kwa kubwili-chimbo kwa chakaka, ni pa kutenda lukwali ni uhu-

hu, Mbanda winu George Bambo witu, mwene nema ni wakutigolola.

Ambuya mnyahi, timpembelela kutiyuwanila.

Muyitikile kulimbiha ntima wake pa liyitikilo linu, pa woga winu, ni pa chitogolanilo chinu, kuti machuwa goha amhuwalile ni amynikihe.

Ambuya mnyahi, timpembelela kutiyuwanila.

Muyitikile kunjepela ni kumgoha awahotole walugu wake woha.

Ambuya mnyahi, timpembelela kutiyuwanila

Muyitikile kuwapikiha chihomo ni kuwagoha, woha wa mnyumba yake Bambo.

Ambuya mnyahi, timpembelela kutiyuwanila.

Muyitikile kuwamulikila Akaaskofu, Akakasisi, ni Akashemasi woha ni kumanya ni mawuliko ga chakaka ga Malcwe ginu; nipa waitunduwihe mbili yake momo pa kuyaganiha ni kulama kwao.

Ambuya mnyahi, timpembelela kutiyuwanila.

Muyitikile kuwahwatika woha wa pa chengo cha Bambo ni waweneke, ni nema, malango, ni kumanyika.

Ambuya mnyahi, timpembelela kutiyuwanila.

Muyitikile kuwapikiha chihomo ni kuwagoha lukolo lwinu woha.

Ambuya mnyahi, timpembelela kutiyuwanila.

Muyitikile kupikiha mihuku yoha kuliyeka ni kuyitingana.

Ambuya mnyahi, timpembelela kutiyuwanila.

Muyitikile kutipikiha ntima kuntogolela ni kunjogopa Mwenga, ni kutenda makakala kulama kwa ndingo wa mahamri ginu.

Ambuya mnyahi, timpembelela kutiyuwanila.

Muyitikile kuyenjekeha lukolo lwinu ni nema kuliyuwana Lilowe linu, kuliyupa ni chitogolanilo chene,

ni kupambika hipambiko hya Roho.

Ambuya mnyahi, timpembelela kutiyuwanila.

Muyitikile kuyingiha pa ndila ya chakaka, woha wahokelile ni wakongeka.

Ambuya mnyahi, timpembelela kutiyuwanila.

Muyitikile kuwalimbika wala wayii mkuyima, kuwapembeha ni kuwayangatila wakugeleleka ntima, kuwayimiha wakugwa, ni pa kuyomokela kunkanyata Shetani pahi pa malwayo gito.

Ambuya mnyahi, timpembelela kutiyuwanila.

Muyitikile kuwapokola, kuwayangatila, ni kuwapeembeha, wala wayii mu ulugu, pa kuhowa hinduni, pa kulaga.

Ambuya mnyahi, timpembelela kutiyuwanila.

Muyitikile kuwagoha woha wayii mkuyenda mwanja pa ndima pangi pa luchi, wambumba wayii mkuwoka wana, woha wakulwala ni wana wakeke, ni mukolele chiha chinu kwa wakungika ni wa mikoli.

Ambuya mnyahi, timpembelela kutiyuwanila.

Muyitikile kuwayepela ni kuwalela wana walanda, wahwila, ni woha wakuhauka.

Ambuya mnyahi, timpembelela kutiyuwanila.

Muyitikile kuwakolela wandu woha chiha.

Ambuya mnyahi, timpembelela kutiyuwanila.

Muyitikile kuwalekelela wa mitumba witu, waku tiwinga, ni wakutikongela, ni kuing'anamula mitima yao.

Ambuya mnyahi, timpembelela kutiyuwanila.

Muyitikile kutipikiha ni kutilindalila hipambiko hinyahi hya ndima, kuti pa chikahi chake tilinogilele nahyo.

Ambuya mnyahi, timpembelela kutiyuwanila.

Muyitikile kutipikiha kupela kwene, kutilekelela zambi hitu ni uhimu witu; nipa mutihwatike ni

nema ya Robo winu Mhuhu, titendekehe matamilo
gitu kwa ndingo wa Lilowe linu lihuhu.

Ambuya mnyahi, timpembelela kutiyuwanila.

Mwana wa Mlungu, timpembelela kutiyuwanila.

Mwana wa Mlungu, timpembelela kutiyuwanila.

Kaling'ohi ka Mlungu wakuhiwuhu zambi hya
milima

Mutipikihe kutiyeka kwinu.

Kaling'ohi ka Mlungu, wakuhiwuhu zambi hya
milima

Mutikolele tenga chiha.

Kristo mutiyuwane

Kristo mutiyuwane

Ambuya mutikolele chiha

Ambuya mutikolele chiha

Kristo mutikolele chiha

Kristo mutikolele chiha

Ambuya mutikolele chiha

Ambuya mutikolele chiha

Atati witu, ayii Kunani. Amen

Liluwo lya Mhuhu Krusostomo

Nema ya

Maluwo gangi ga Malaulau ni ga Kimihi**Pa malaulau**

(1) Mwalimu ahotola kuluwula mahina ga wandu pangi hindu hila hilinganila kuluwilika. Pakuyomoka kwake liluwo liyii loha, ayegeye ;—

Mwal ; Ambuya muyuwanile liluwo litu

Wandu ; Ni chilito chitu chimlikile

(2) Maluwo aga mwalimu ahotola kuwaha papamo ni wandu ;—

Mlungu Atati, tinchengula magambo ga chiha chinu chanawingi ni n agambo mutigohite wa umi mpaka lalino. Timpembeha mutipikihe Roho winu Mhuhu, atilongohe pa mahengo gitu goha, ni kutama Bambo pa mioyo yitu ; kwa Yesu Kristo Ambuya witu. Amen.

Ambaya Mlungu, mwapikihe chihomo wohu awo nilinganile kuwaluwila ; kwa Yesu Kristo Ambuya witu. Amen

Maluwo ga Wahuhu gatiyangatile ; Malaika witu wakutigoha watilolele ; † Chihomo cha Mlungu, mwene hikakala hyakape, Atati, ni Mwana, ni Roho Mhuhu, chitame ni tenga lalino ni machuwa goha.
Amen.

Pa kamih

Mwalimu ahotola kuwaha maluwo aga papamo ni wandu wake :—

Atati mwene hikakala hyakape, timchengula magambo ga kutigoha lalino. Tindumba kwa goha ago mwatitendile tenga.

Mutikengelele pa hilungu hyoha hya higa ni hya roho kilo echi; kwa Yesu Kristo Ambuya witu.

Amen

Ambuya, mutikolele chiha, mutilekele zumbi iki hyatikumbukile hino. Mutiyangatile tigehe kawili chilau kugoha mahamri ginu; kwa Yesu Kristo Ambuya witu. Amen

Maroho ga awo wahwile pa liyitikilo, gapumile pa kuliyeke kwa chiha cha Mlungu. Pa mawoko ginu tiwika roho witu, pakuti Mwenga mwatikombwile, Ambuya, Mlungu wa chakaka.

Eukaristia Yihuhu.

PANGI MISSA YIHUHU

Maluwo ga kuliwikinganila

✠ Pa Libina Iya Atati, ni Iya Mwana, ni Iya Roho Mhuhu, Amen.

Ant; Niyenda ku mazabahu ya Mlungu

Zaburi 43

1. MLUNGU, mundemule,, muniyimilile pa magambo kupindiha lukolo langa ulongo:
Munjupule pa wandu wakuchenjela ni wakupopotola:
2. Magambo Mwenga Mlungu wa hikakala hyangu; kwa kiki mwanitagile?
Kwa kiki niyendayenda pakulila, magambo ga kunyaka kwa wakohakalila?
3. Mutume lilangalila linu ni hya chakaka hinu; hila hinilongohe;
Hiniyendehe ku chitumbi chinu cha pa yika, ni pakupiliha pinu.
4. Nipa hakiniyende ku mazabahu ya Mlungu; kwa Mlungu wakuhekelela kwangu:
Ni pa chilumbo hakinindumbe, Mlungu, Mlungu wangu.
5. Kwa kiki uhingilika umi wangu? kwa kiki uyowanile nkati mwangu?
Umhuwalila Mlungu; magambo hakinindumbe yombe kawili, ukengelelo wa chiungi changu ni Mlungu wangu.

Akuhike Atati.Amen.

Ant; Niyenda ku mazabahu ya Mlungu;

Kwa Mlungu wa kuhekelela kwangu.

V. Kuyangatila kwitu kuyii pa Lihina lya Ambuya
 R. Yombe apangite Kunani ni ndima
 V. Lilumbalike Lihina lya Ambuya
 R. Chitumbulii lalino ni kwa hyaka ni hyaka

Tiluwe

Muwuhile pa tenga, timpembaha Ambuya, hihaka-hu hitu hyoha, nahuli ni ntima wakugululika titame wakuyaganila kuyingila pa Utamo uhuhu muni. Kwa Kristo Ambuya witu. Amen

MISSA YA WANAFUNZI

Introit

Ant; Munimihe ni mhanjo ni hakinigululike munohe, ni hakinitame wuu kupitikiha theluji.
 Zab: Munipikihe nema Mlungu, kwa ndingo wa ulongo wunu; Kwa ndingo wa kuyoloka machili ginu, muhime hyakuhoka hyangu,

Akuhike Atati.

Ant; Munimihe ni mhanjo.

Mahamri Kumi

Panyuma pa 1-9 muyangaye "Ambuya mtikolele chiha, ni mung'anamule mioyo yitu, tiligohe lilowe ili"

Panyuma pa 10, muyangaye "Ambuya, mtikolele chiha ni mkalembe malowe ginu aga goha pa mioyo yitu timpembaha Mwenga."

“ *Pangi pa utamo wake Kyrie Eleison*

Ambuya, mukolele chiha
Ambuya, mukolele chiha
 Ambuya, mukolele chiha
Kristo, mukolele chiha
 Kristo, mukolele chiha
Kristo, mukolele chiha
 Ambuya, mukolele chiha
Ambuya, mukolele chiha
 Ambuya, mukolele chiha

Kasisi; Ambuya, atame ni mwenga

Wandu; Atame ni roho winu

Liluwo lya lya lya lya

Epistola

“Tinchengula Mwenga Mlungu”

EVANGEL YIHUHU

Liyango lyakutumbulila “Akuhike Yombe Mlungu.”

Liyango lyakawili “Tindumba Mwenga Kristo.”

MISSA YA WAKUYITIKILA

Liyitikilo lya Nikaya

NINJITIKILA MLUNGU YUMO, Atati mwene hikakala hyakape, Wakupanga Kunani ni ndima, Ni hindu hyoha hyakuwoneka ni hyangakuwoneka.

Ni Ambuya yumo Yesu Kristo Mwana wakuwelekeka kayika wa Mlungu, Awelekike mwa Atati wake palungi pa hyaka, Mlungu mu Mlungu, Lilangalila mu Lilangalila, Mlungu wa chakaka mu Mlungu wa

chakaka, Awelekike, ngakupangika, Mwene Utamo umo ni Atati, Kwa oyo hindu hyoha hipatite kutama apa.

Ni yombe magambo gitu wana wa adam, ni magambo ga ukengelelo witu, shelile Kunani, Ni alitolele higa mu Roho Mhuhu ni Mariamu Virgin ni atendike mundu, Ni atachambulike pa msalaba magambo ga tenga, chikahi cha Pontio Pilato. Aweni mang'a hiko, ni kuwikika mtengele. Ni ayimi kawili lyuwa lya katatu kwa ndingo wa Malembo, ni akwelite Kunani, ni atama pahi pa chiwoko cha malililo cha Atati. Ni hakiahike kawili ni kukuhika kwake, awatemule wakulama ni wakuhwa: ni pa Uwambo wake pangakuyomokela.

Ninjitikila Roho Mhuhu, Ambuya, ni Wakulamihia, Oyo apita mwa Atati ni mWana, Oyo papamo ni Atati ni Mwana awilika-chimbo ni kukuhika, Ni yombe apwagite pa wakulota.

Niliyitikila Church Limo, Katoliko, ni Apostoliko.

Nihumbula Ubatizo umo kwa kulekeleka zambi. Ni nilolalela kuhyuka kwa wakuhwa, ni kulama kwa hyaka ihyo hakihikike. Amen

Liluwo lya Hembe

Kuhumbula kwa zambi

Kuwaluwila wohi wa Church lya Kristo

Wandu kuyanga "Ambuya, muyuwanile liluwo litu"

Kasisi	Ambuya atame ni mwenga
Wandu	Atame ni roho winu
Kasisi	Mnyakuhaye mioyo yinu
Wandu	Tiinyakuka kwa Ambuya
Kasisi	Tachengule Ambuya Mlungu witu
Wandu	Chiyii chakulinganila, ni cha lukwali kutenda viwila

Sanctus ni Benedictus qui Venit.

MHUUH, MHUUH, MHUUH, Ambuya Mlungu wa mwanja, Kunani ni mmilima itwilila kukuhika kwinu. Akuhike Ambuya ayii Kunani. Wakulumbalika Yombe abika pa Lihina Iya Ambuya. Hosanna Kunani kwene.

Rasisi ; Kuliyeke kwake Ambuya kutame ni mwen-ga machuwa goha

Wandu ; Kutame ni roho winu

Agnus Dei

Kaling'ohi ka Mlungu, wakuhiwuha zambi hya milima

Mutikolele tenga chiha

Kaling'ohi ka Mlungu, wakuhiwuha zambi hya milima

Mutikolele tenga chiha

Kaling'ohi ka Mlungu, wakuhuwuha zambi hya

Mutipikihe kuliyeke kwinu

(nambo pa Missa ya Wakuhwa mayango ni viwila

Muwapikihe kupumulila

Muwapikihe kupumulila

Muwapikihe kupumulila kwangakuyomoka)

GLORIA IN EXCELSIS

AKUHIKE Mlungu Kunani, ni pahi pani kuliyeke,
kwa wandu ulongo unyahi.

Tindumba mwenga, timpikiha chihomo, timbwili-
chimbo,

Timkuhiha, tinchengula magambo ga kukuhika
kwinu kukulungwa,

Ambuya Mlungu, Bambo wa Kunani, Mlungu
Atati, mwene hikakala hyoha.

Ambuya, Mwana wakuwelekeka kayika Yesu Kri-
sto; Ambuya Mlungu,

Kaling'ohi ka Mlungu, Mwana wa Atati,

Wakuhiwuha zambi hya milima, mutikolele chiha.

Wakuhiwuha zambi hya milima, mutikolele chiha,

Wakuhiwuha zambi hya milima, muyitikile liluwo
litu.

Wakutama pahi pa chiwoko cha malililo cha Mlu-
ngu Atati, mutikolele chiha.

Magambo Mwenga yika Mhuhu; mwenga yika
muyii Ambuya;

Mwenga yika Kristo, papamo ni Roho Mhuhu,

Muyii panani muni pa kukuhika kwake Mlungu
Atati. Amen

Pa kupita

Ant; Mwalihite mhuku winu ni chiliwi cha malaika :
ni kuwapikiha chiliwi cha Kunani.

Zab; Mundumbaye Ambuya mihuku yoha : Mu-
nkuhihe, mwenga malukolo goha.

Magambo ulongo wake upitikiha kwitu tenga :
ni hya chakaka hya Ambuya chitamile
hyaka hyakape, Mundumbaye Ambuya.

Akuhike Atati.....

Ant; Mwalihite mhuku.....

Anima Kristi

Roho wa Kristo unihulihe
Higa ya Kristo yinilamihe
Mwahi wa Kristo unikinihe
Kung'ahika kwa Kristo kunipenibehi
Machi ga luteta Iya Kristo ganigulule
Yesu Mnyahi muniyuwanile
Nkati mwa mawalakata ginu munihihe
Mkanileka kupatukana ni Mwenga
Pa mahakahu yula wa mitumba munigohe
Chikahi cha kuhwa kwangu mungeme
Kuhika kwinu munilaluhe
Nipate papamo ni Wahuu wiuu
Kundumba hyaka ni hyaka.

Malumbo ga Mlungu

Alumbalike Mlungu
Lilumbalike Lihina lyake lihuhu
Alumbalike Yesu Kristo, Mlungu mwene ni
Muntu mwene
Lilumbalike Lihina lyake lihuhu
Ulumbalike ntima wake nhuhu
Alumbalike Yesu Kristo, pa Sakramenti
yihuhu ya Mazbahu
Alumbalike Roho Mhuhu Wakuyimalila
Alumbalike Anyongolo wa Ambuya witu,
Mariam nhuhu muni
Lilumbalike lihina lyake Mariam, Virgin ni
Anyongolo
Alumbalike Mlungu pa Akamalaika wake,
ni pa Wahuhu wake.

Zaburi.

ZABURI 8.

- A** MBUYA, Ambuya witu, okwe lihina linu lakupitikiha pa ndima wohu :
- Mwenga wakupeleka mbili yinu panani pa Kunani!
- 2 Kuhuma pandomo pa tukeke ni wakuyonga mwatawakihe hikakala, magambo ga walugu winu :
Kukaniha wakuhakalila ni wakukiliwuhila hikakahu.
- 3 Apa nilola Kunani, hyakutenda hyangonji hinu :
Mwehi ni ndondwa, ihyo mwawikinganila.
- 4 Kiki kamundu, mumkumbukile ?
Ni mwana wa adamu, mundolelele ?
- 5 Mwampelebelehe pahi pachokope namkumhikila Mlungu :
Ni muhungulula mutu wake ni kukuhika ni liyniko.
- 6 Mwamtendite wakulinganiha pa ihyo gahite-ndite mawoko ginu :
Mwahiwikite hyoha pahi pa malwayo gake.
- 7 Mang'ohi ni ng'ombe, hyoha ehyo :
Ena, ni hikoko hya pa ndika.
- 8 Hiyuni hya kunani, ni homba hya mluchi :
Chiyu choha chipita mwakuyenda mwaluchi.
- 9 AMBUYA, Ambuya witu :
Okwe lihina linu lakupitikiha pa ndima wohu !

ZABURI 15.

- A** MBUYA, nani awende utamo pa hema yinu ?
Nani apilihe pa chitumbi chinu cha pa yika ?
- 2 Oyo ayendayenda mwakuyomokanila, ni atendaye hya lukwali :
Ni apwaga hya chakaka pa ntima wake.

- 3 Oyo ngakumkupikiha ni lilime lake, ngakumte-
ndela njake hihakahu :
Ni ngakumkuwa mwenehe wake.
- 4 Pa mihi yake mpalahi ayuyulika, nambo awayi-
nikiha wakunjogopa Ambuya :
Oyo alapila nipa ngakung'anamula, nakayii alipa-
tila hihakahu.
- 5 Oyo ngakupeleka chuma chake kupata ndulutu,
ni ngakuyupa mhaku wa pah! kumpindika
oyo wangakuhoka :
Oyo wakuhitenda hindu ihi, ngakabegelele kwa
hyaka.

ZABURI 20.

- A** MBUYA akuyange pa lyuwa lya kuhauka :
Lihina lya Mlungu wa Yakobo likuwike pa
katumbi.
- 2 Akupelekele kuyangatila kuhuma kwa utamo wa
pa yika :
Ni kuhuma kwa Zion akuyihilile hikakala.
- 3 Ahikumbukile hembe yinu hyoha :
Ahiyupalile hembe yinu yakuyocheka.
- 4 Akupikihe kwa ndingo wa ntima winu :
Ni ayomwile malango ginu goha.
- 5 Tilalutile pa ukengelelo winu, ni pa lihina lya
Mlungu witu tiyimihe mbendela hitu :
Ambuya ayomwile maluwo ginu goha.
- 6 Hino timanya kuti Ambuya amkengelela waku-
yihilika wake :
Anjange kuhumila kunani kwake kuhulila, ni
chikambako cha ukengelelo cha chiwoko chake
cha malililo.
- 7 Awa pa magareta, awo pa makavalo :
Tenga nambo tiliwule lihina lya Ambuya Mlungu
witu

- 8 Awa wayinime ni wagwile :
Tenga nambo tayumwike ni kuliyimihā.
9 Ambuya, mungengelele Bambo :
Ni mutiyange apa tikemela.

ZABURI 21. 1—6

- A** MBUYA, Bambo ahekelela pa hikakala hinu :
Ni pa ukengelelo winu ahina muni.
2 Mwampikihe matukulilo ga moyo wake :
Ni maluwo ga milomo yake ngakunjima mwenga.
3 Magambo mumpingana ni hya chihomc ni unyahi :
Muika pa mutu wake chihoti cha gold chakugululika.
4 Hyakulama aluwite kwinu, ni mwampikihe yombe :
Kulachupihā machuwa gake hyaka ni hyaka.
5 Kukulungwa kuyii kukuhika kwake pa ukengelelo winu :
Liyiniko ni ukulungwa munjihilila.
6 Magambo mwandendile mwene chihomo kwa hyaka :
Mwankini he ni kuhekelela pa miho yinu.

ZABURI 23.

- A** MBUYA wakunilima :
Ngakunihowa kandu.
2 Pandindi uwihī anigoneha :
Pa machi pakupumulila anihindikila.
3 Umi wangu aukiliwuhila :
Anilongoha pa mipalu ya lukwali, magambo ga lihina lyake.

- 4 Ena, nakayii .niyenda pandika pa lwihi piya,
ngakuyogopa nenga hihakahu :
Magambo mwenga papamo ni nenga, mpihi winu
ni mkongocho winu, ihyo hinipembeha.
- 5 Mutardika meza pa miho yangu, palungi pa wa-
lugu wangu :
Mayihilila mutu wangu ni mahuta ; nteko ya-
ngu yigeremuka milomo.
- 6 Chakaka unyahi ni ulongo hakiniwingilile ma-
chuwa goha ga umi wangu :
Ni hakinitame pa nyumba ya Ambuya machu-
wa goha.

ZABURI 24.

- N**DIMA uyii wake Ambuya, ni hyoha hitwilila
momo :
Mondo, ni wala watama pahi momo.
- 2 Magambo autamihe pahi panani pa luchi :
Ni auwikingani panani pa mikuka.
- 3 Nani akwela pa chitumbi cha Ambuya?
Ni nani ayina pa utamo wake wa pa yika ?
- 4 Oyo wanga ndumbulu pa mawoko gake, ni waku-
gululika pa ntima :
Oyo ngakulitunduiha umi pa upuhe, ni ngaku-
lapila pa kuchenjela.
- 5 Hakianyakuhe chihomo kukuma kwa Ambuya :
Ni lukwali kwa Mlungu wa ukengelelo wake.
- 6 Echi chiweleko cha wala wakumbingilila.
Wala wakupala chiangi chinu, Mlungu wa Yakobo.
- 7 Mtunduwihaye mitu yinu matanga ; Mtunduwi-
wikike, mwenga milyango ya kalongohi :
Bambo wa kukuhika ayingilaye.
- 8 Nani Bambo wa kukuhika ?
Ambuya mwene hikakala ni wa chikambako,
Ambuya wa chikambako pa ngondo.

- 9 Mtunduwihaye mitu yinu matanga ; ena, mtundu-
wihaye milyango ya kalongohi :
Bambo wa kukuhika ayingilaye.
10 Nani Bambo wa kukuhika ?
Ambuya wa mawanja, yombe Bambo wa kuku-
hika.

ZABURI 31. 1—6

- P**A MWENGA Ambuya mitilila ; nikayihilika honi :
Pa lukwali lwinu muniyupule nenga.
2 Mutegelele lukutu linu kwa nenga : munihuwule
kanyata :
Mutame kwa nenga uliwu wa makili, nyumba ya
linga kungegelela :
3 Magambo mwenga uliwu wononono wangu ni
linga langu :
Momo, magambo ga lihina linu, munilongohe ni
kunihindikila.
4 Munihuwule pa chitawa echo wanihihila .
Magambo mwenga makili gangu.
5 Pa chiwoko chinu niwika roho wangu :
Mwangombwile Ambuya, mwenga Mlungu wa
chakaka.

ZABURI 51.

- M**UNIPIKIHE nema Mlungu, kwa ndingo wa
ulongo wina :
Kwa ndingo wa kuyoloka machiha gina, muhime
hyakuhoka hyangu.
2 Munigulule muni pa hihakahu hyangu :
Munihululile pa zambi yangu.
3 Magambo nimanyingani hyakuhoka hyangu :
Ni zambi yangu yiyii pa miho yangu chitamile.

- 4 Nahokite mwenga, mwenga yika, ni natendite
chihakahu pa miho yinu :
Nahuli muwoneke wa lukwali pa kuwaha kwinu,
ni mhuhu pa kutemula kwinu.
- 5 Lolaye, pa chihakahu naumbike :
Ni pa zambi anyongolo wangu ayimiti ndumbo
ya nenga.
- 6 Lolaye, hya chakaka mupala muhyeto :
Ni pa kuyuwalika munimanyihe malango.
- 7 Munimihe ni mhanjo, ni hakinigululike :
Munyohe, ni hakinitame wuu kupitikiha theluji.
- 8 Munyuwanihe kuyangala ni kuhekelela :
Hihupa ihyo mwahituwile hakihihine.
- 9 Muhihe chiungi chinu pa zambi yangu :
Ni kuhima hihakahu hyangu hyoha.
- 10 Mlungu, munbangile ntima wakugululika :
Muutende roho wa hino nkati mwangu.
- 11 Mukanitagila kuhuma pa miho yinu :
Mukaniyupa Roho winu wa pa yika.
- 12 Mungiliwukile kuyangala kwa ukengelelo winu :
Munipagamakihe ni roho wa uweneke.
- 13 Niwamanyihe wakuhakala ndila hinu :
Wangiliwukile mwenga wene zambi.
- 14 Muniuwule pa magambo ga chahi Mlungu, Mlu-
ngu wa ukengelelo wangu :
Lulime lwangu hakilulute omo mutendela lukwali.
- 15 Ambuya, mwopole milomo yangu :
Ni pandomo pangu hakipandumbi.
- 16 Magambo mwenga ngakupala pa hembe ya kuhi-
kita, pangi nikayipeliki :
Ni hembe ya kukwela ngakuiyitikila mwenga.
- 17 Hembe ya Mlungu ni roho wakukayuka :
Ntima wakukayuka ni wakukanyika, Mlungu
ngakuuyuyula.

- 18 Untendele Zion lukwali kwa kuyitikila kwako :
Uhichenge hiliwa ya Yerusalem.
- 19 Ni papo hakuipale papo pa hembe yakuhikita ni
hembe ya hilima :
Ni papo hakiukwelehe wana wa ng'ombe pa
mazbah yako.

ZABURI 67.

- M**LUNGU, atiyihilile nema, atipikihe chihomo
Amulikihe chiungi chake kwa tenga.
- 2 Ndila yina yimanyike muni mundima :
Ukengelelo winu pa mihuku yoha.
- 3 Malukolo gamchengulile mwenga Mlungu :
Gamchengulile mwenga malukolo goha.
- 4 Hilawa hihekelele ni nyimbo hya chihoko :
Magambo mutemula malukolo chigololekele, ni
kulongoha hilawa hya pa ndima.
- 5 Malukolo gamchengulile mwenga Mlungu :
Gamchengulile mwenga malukolo goha.
- 6 Ndima upeleka hipambiko hyake :
Mlungu, Mlungu witu, atipikiha chihomo.
- 7 Mlungu hakitipikihe chihomo :
Ni hihongwa hyoha hya ndima hakinjogope.

ZABURI 100

- M**UNDULUTILAYE Ambuya :
Wa ndima woha.
- 2 Muhengebaye Ambuya pa kuhekelele :
Muhikaye pa m ho pake ni kuyimba.
- 3 Mmanyaye kuti Ambuya yombe Mlungu :
Yombe atipangite, ni tenga tyii wake, lukolo
lwake, ni mang'ohi ga pakulihila pake.

- 4 Musingilaye pa milyango yake ni kuchengula,
ni pa mangala gake ni kulumba.
Munchengule ni kulipikiha lihina lyake chihomo.
5 Magambo Ambuya unyahi; chitamile ulongo
wake,
Ni liyitikilo lyake upaka chiweleko ni chiweleko.

ZABURI 113.

- M**UNDUMBAYE Ambuya; Mlumbaye, mwenga
wawanda wake Ambuya:
Mahlumbe lihina lya Ambuya.
2 Lihina lya Ambuya lipikihike chihomo:
Chitumbuli hino mpaka hyaka.
3 Pa kupita lyuwa mpaka kuyiwila kwake
Lihina lya Ambuya liyii kulumbika.
4 Ambuya ayii panani pa mihuku yoha:
Panani pa panani kukuhika kwake
5 Nani ngati Ambuya Mlungu witu oyo alitundu-
wiha kutama pahi:
Oyo alileheleha kulola Kunani ni pa ndima?
6 Awayimiha wakutepa kuuka pa lihumbi:
Ni awanyakuha wakiwa kuuka pa chiyala.
7 Kutamsha papamo ni wanyeke
Papamo ni wanyeke wa lakolo lwake.
8 Amtendela wagumba kutama anyongolo waku-
hekelela wa wana
Mundumbaye Ambuya.

ZABURI 116. 11—16.

- K**IKI hakinukiliwuhile Ambuya:
Magambo ga hyoha hyakunegonela hyake
kwa nenga?
2 Hakintunduwihe nteko wa ukengelo:
Ni kakinkwele lihina lya Ambuya.

- 3 Hakinimtendele Ambuya malipilo gangu :
Hino palungi pa lukolo lwake loha.
- 4 Kwene ulohi pa miho ya Ambuya :
Kuhwa kwa wala wa ulongo wake.
- 5 Nimpembeha Ambuya, magambo niyii mbanda
winu ; mbanda winu, mwana wa mbumba
winu :
- Mwaiwopwile migoyi yangu.
- 6 Kwinu hakiniyihile hembe ya kuchengula :
Ni kutundwiha lihina lya Ambuya.
- 7 Hakinimtendele Ambuya malapilo gangu :
Hino palungi pa lukolo lwake loha.
- 8 Pa mangala ga nyumba ya Ambuya, pakati pako
Yerusalem :
Mundumbaye Ambuya.

ZABURI 121

- H**AKINITUNDUWIHE miho yangu ku hitumbi:
Kuhumila kwako kuyangatila kwa ngu ?
- 2 Kuyangatila kwangu kuhuma kwa Ambuya :
Wakupanga Kunani ni ndima.
 - 3 Ngakayitikile yombe chigulu chako kuhegeka :
Oyo wakukulindilila ngakaochele.
 - 4 Kalole, wangaochele wangaloka :
Wakundindilila Israel.
 - 5 Ambuya ayii wakukulindilila :
Yombe chihulu chako pa chiwoko cha maboko.
 - 6 Muhi lyuwa ngakakalipe mwenga :
Nakayii mwehi kilo.
 - 7 Ambuya hakikulindilile pa chihakahu chiyi choha :
Yombe hakikulindilile umi wako.
 - 8 Ambuya hakikulindilile kupita kwako ni kuyingia
kwako :
Chitumbulii hino mpaka hyaka.

ZABURI 122.

- N**AHEKELILI apa wayegiye kwa nenga :
 Tiyendaye ku nyumba ya Ambuya.
- 2 Magulu gitu gayii chiyimile :
 Pa milyango yako Yerusalemi.
- 3 Yerusalemi wakuchengeka :
 Ngati chikaya chakulukana papamo.
- 4 Kuko hikwelela hilawa, hilawa hya Ambuya :
 Kundagiha Israel ukaboni, kulichengula lihina lya
 Ambuya.
- 5 Magambo papo hiwikike hitihu hya Ambuya :
 Hitihu hya chiwambo cha nyumba ya David.
- 6 Mukuluwaye kuliyeke kwake Yerusalemi :
 Awa wakukutogolela wahwanikila.
- 7 Kuliyeke kutama mu hipambala hyako :
 Ni kutamalakiha pa nyumba yako ya chiwambo.
- 8 Magambo ga alongo wangu ni aayangu :
 Nipwaga hino, Kuliyeke kutame mwako.
- 9 Magambo ga nyumba ya Ambuya Mlungu witu :
 Hakinipalile unyahi wako.

ZABURI 127.

- A**KALEMA Ambuya kuchenga nyumba, watonda
 waka wakuichenga :
 Akalema Ambuya kuchigoha chikaya, akiluha
 waka wakulindilila.
- 2 Kwa waka kwina, mwenga wakulawalila kuyu-
 muka, ni kukawakiha kutama pahi, ni kulya
 chiliwi cha mahengo ga kutopeha :
 Wiwila awapikihe wakutogoleka wake lugono.
- 3 Kalole wana wayii wingila kukuma kwa
 Ambuya :
 Chipanibiko cha ndumbo chiyii hupo.

- 4 Ngati mipamba pa chiganja cha wa chikambako :
Wiwila wana wa ukombo.
5 Mwene chihomo oyo ayi ni mhako wake waku-
twilila wombe ;
Ngawakayihilike ni lihamu, apa hakiwapwage ni
wakuhakalila pa ndyango.

ZABURI 130.

- K**UHUMA pa hini namkenili mwenga Ambuya :
Ambuya mayuwanile kuyowanila kwangu.
2 Makutu gini gatame chitegelile :
Kwa kuyowanila kwa kupembeka kwangu.
3 Ana mulindilila hihakahu Ambuya :
Ambuya, nani hakiayime ?
4 Nambo kwini kulekelela :
Nahuli muyogoheke.
5 Nindindilila Ambuya, umi wangu undindilila :
Ni pa lilowe lyake nilikuwalia.
6 Umi wangu undolalela Ambuya, kupitikiha wala
wakulindilila kuchili :
Ena, kupitikiha wala wakulindilila kuchili.
7 Israel, mumiwalile Ambuya :
Magambo ni Ambuya uyi ulongo, ni pa yombe
kukombola kwakuyoloka.
8 Ni yombe hakiakombole Israel :
Pa hihakahu hyake hyakape.

ZABURI 134.

- L**OLAYE, mumpikihe Ambuya chihomo, mwenga
wakutumakila Ambuya :
Wakuyima pa nyumba ya Ambuya kilo.

- 2 Mnyakuhaye mawoko ginu kwa utamo wa pa yika :
Ni mumpikihaye Ambuya chihomo.
3 Ambuya kuhuua pa Zion aumpikihe mwenga
chihomo :
Yombe wakupanga Kunani ni ndima.

ZABURI 148.

- M**UNDUMBAYE Ambuya. Mundumbaye Ambuya kuhuua Kunani :
Mundumbaye, pa utamo wakutunduwihika.
2 Mundumbaye, akamalaika wake wohu :
Mundumbaye, mawanja gake goha.
3 Mundumbaye, lyuwa ni mwehi :
Mundumbaye, ndonda hyoha hya lilangalila.
4 Mundumbaye, Kunani kwa kunani :
Ni machi muii panani pa panani.
5 Hililumbe lihina Iya Ambuya :
Magambo yombe atawike ni bilengeka.
6 Ahiyimiha kwa hyaka ni hyaka :
Ahipikihi hamri nga yimo yihotola kupitilila.
7 Mundumbaye Ambuya kuhuua kwa ndima :
Hikoko hya luchi ni huu hyoha.
8 Moto ni hula hya nduwa, snow ni makuunguwa :
Mbepo ya chimbunga, chitendile lilowe Iyako.
9 Hitumbi ni tutumbi twoha :
Mikongo yene hipambiko ni mikunguza yoha.
10 Chikoko ni chilehi chiyi choha :
Chakukwawa pahi, ni hiuni hyakuuluka.
11 Mawambo ga ndima, ni hilawa hyoha :
Wanyeke ni wohu wakutemula pa ndima.
12 Wakakombo ni kawili wahinja :
Wakongolo ni kawili wana.

- 13 Waliitumbe lihina iya Ambuya ; magambo lihina
lyake pa yika litunduwihika :
Ukulungwa wake panani pa ndima ni Kunani.
14 Ni atundowihe linyelo kwa lukolo lwake, kulumba
kwa awa wakutogoleka wake :
Ena, Wana wa Israel, lukolo papipi ni yombe.
Mundumbaye Ambuya.

ZABURI 150.

- M**UNDUMBAYE Ambuya. Mundumbaye Mlungu
pa utamo wake wa pa yika :
Mundumbaye yombe, pa nyengelela ya makakala
gake.
2 Mundumbaye, pa ihyo hya chikambako chake :
Mundumbaye, pa ndingo wa wangi wa ukulungwa
wake.
3 Mundumbaye, pa kuhona mbata :
Mundumbaye, pa lipango ni chilumbo.
4 Mundumbaye, pa himbumbuli ni kuhina :
Mundumbaye, pa migoyi ni mtolonji.
5 Mundumbaye, pa mikwenda yakuyuwatika :
Mundumbaye, pa mikwenda yakutunduwika.
6 Choha chene mhuhi chindumbe Ambuya :
Mundumbaye, Ambuya.

Nyimbo

PA MALAULAU

2

Chimbu chihikile
Tindumbalile Mlungu ;
Lalino apikihe
Titume ngakuhoka.

Malowe gakuhyoma
Tigakanile goha,
Pa moyo ni pa ndomo
Ambuya tindumbaye.

Wahuhu pa mioyo
Titame woha hino,
Pa miho ni makutu
Yahuhu tihitende.

Pa kupitila lyuwa
Mpaka liyiwi,
Mutiyangate hino
Kumbingilil' Ambuya.

Yiniko, kukuhika
Papamo t pikihe
Atati ni kwa Mwana
Ni Yombe Roho Mhuhu.

4

Kutogoleia kuwoneka
Machuwa goha pakuwuka ;
Pa lwihi luni mwagohite
Titame tenga muhi hino.

Kukiliwuka lyuwa, chiha
Chitihimana cha lalino,
Hya Mlungu tihilolalile,
Ni hya Kunani tihiluwe.

Lihengo tikalahe kuko
Loha kwa Mwenga tiyihile,
Hakitipate ngakuhowa
Kwa hamba ehi muwikile.

Mahengo ga machuwa goha
Kuyaganila pa maluwo
Yatihimane apo ndila
Kunhengelela Mlungu witu.

Ambuya chitogolanilo,
Kwinu kwa mwenga tiyihile ;
Machuwa goha mtiyendehe
Tilame omo tiluwila.

13

PA KAMIHI

Palungi kuyomoka lyuwa,
Timpempelela mutigohe
Pakugoneta kilo uni,
Tipumungani wicho

Hihakahu hyoha muhiwanga,
Hingi hulugu mukanihe,
Ni wamitumba wa pa roho
Wakatipwetekeha,

Atati witu, mtiyuwane,
Kwa Ambuya witu Yesu,
Papamo wombe niyo Roho,
Atame hyaka hyoha.

15

Pa muhi lyuwa likapite
Kung'anamuka lwihii,
Wiwila umi wakukepa
Uyumbatika nyata.

Yesu wakutachambulika
 Kwa wandu pa msalaba;
 Titogolele kuhwa kwinu,
 Mmawoko mwinu tihwe.

Tindumbe Atati chilumbile,
 Tindumbe yombe Mwana,
 Ni mwenga Roho tikulumbé
 Kwa hyaka ni kwa hyaka

16

Uyenda muhi uni	Mahengo gayomwike
Tindumbalil' Ambuya,	Ambuya tinjimbila,
Tiluwe kuyegeya	Hipandu hyake kilo,
Pa kilo tikahoka,	Muwuhe kwakutali.
Pa miho yinu mutiwiki,	Pa miho yinu mutiwiki,
Pa kilo mutigohe, Yesu.	Pa kilo mutigohe, Yesu.

Uyenda muhi uni	Mutaine wakugoha
Mitima tinyakuha,	Wa umi wangu nenga
Tinduwa titamaye	Magambo muhimanya
Upandu pakutupu,	Hitawa hya ndila.
Pa miho yinu mutiwiki,	Maluwo gitu muyuhwane,
Pa kilo mutigohe, Yesu.	Kwa hyakamutigohe, Yesu.

17

Lilangalila lene, mwenga tindamuha
 Wa Mlungu wa pa yika, chilamile,
 Mhuhu wa wahuhu wohu Yesu Kristo.

Lyuwa hino liyii mkuyoga
Chikahi chake cha kamihi
Tiwayimbile Atati, Mwana, niyo Roho.

Mulinganile poha kulumbika
Pa ndomo panga zambi,
Mwana wa Mlungu, umi mupeleka
Momo pa ndima woha wandu wandumbaye.

89

MACHUWA GOHA,

Yesu alumbike
Yombe pakulaga
Amwagile tenga
Mwahi wake woha.

Mwahi wake Habil
Ugohe magambo,
Mwahi wake Yesu
Zambi awuhila.

Nema niwo umi,
Kwangu mwahi mwake,
Chika chake Yombe
Chiyolwike muni.

Ukalapukile
Pa mioyo yitu
Atila Shetan
Wangakutilema.

Tindumbinganila
Mkuka nu wa mwahi,
Wakutikombola
Ni lukolo lwake.

Natyiimba pani
Nyimbo ya kukweha,
Ehi malaika
Wahihekelela.

Mtunduwihe nyimbo,
Tiulumbe mwahi
Owo Kristo mwene
Amwagile tenga.

123

Lyuwa lila lakuhyuka
 Roho, higa, yihimana
 Mang'ahiko ni kulila
 Pakutupa.

Higa, Roho, hiumubana
 Ngakwapatulana kandu;
 Wakuhwanangana Kristo
 Chikinile.

Pani Roho alekana
 Higa yikapumulile,
 Mu chihuwailo chitu
 Kugoloka.

Lyuwa lya kunyamba lila
 Lakubekelile muni
 Ngakupitilila hyaka
 Ngayomoka.

Yakutopelela higa
 Pa tengela yigonile
 Mpaka lyuwa lya chiheko
 Lya Pasaka.

Lyuwa lila lya chihomo,
 Woha' apita mutengele;
 Mwan, Atati, Amac, Ndo-
 ngu
 Wahimana

Nampo roh' ukanganika
 Pa kuluwa chiluwile,
 Umkuhiha Mlungu wake
 Pa kuhyuka.

Kuko tihakikingani
 Yesu Kristo panyomoko,
 Pakwayitikila poha
 Mwenga yika.

169

Kuyhunguluta pa chitiho
 Wayima akamalaika,
 Mbumbu ni pa mitu yao
 Wayimba nyimbo pa hilumbo.

Wandindilila wa tayari
 Kundumba Mlungu ni kuyuhwa,
 Ni wangi pa lilowe lake
 Wagohi wandu wa pa ndima.

Ambuya mupeleke muni
 Pa ndila kutigoha tenga,
 Ni pa hilugu hya mu kilo
 Mlungono kutilolalela.
 Wiwila hyangatiyonanga,
 Mhakahu yula ni hilungu ;
 Natihwa hyatitame hyaki
 Knyima pa chitiho chila.

176

Nani awo ngati ndondwa,
 Wakuyima kwake Mlungu ?
 Ni pa mitumbumbu yao
 Wakumila kwako awa ?
 Wanjimbila Alleluya
 Mlungu Bambo wa Kunani !
 Nani awa wa lukwali,
 Wene nguo hya kung'anya ?
 Hyaki hyahiweye wicho
 Nguo ehe hya Wahuhu ;
 Ngakuyonungeka awa
 Kuumila kuko nambo ?
 Awa walawakomine
 Kwa Nkengelelo wao,
 Wandu wakukang'amala
 Ngakutenda mahakahu ;
 Wala wakomine wicho
 Walemite ni kuhonga.
 Walagite pa mioyo
 Ni pa kung'ahika muni,
 Ambuya wampembebele
 Oyo awalumbalile ;
 Kukomana kuyomwike
 Kung'ahika pakutupu.

Wakambona wa makili
Ni pa yombe wakayime
Higa, Roho, hyaka hyoha
Wandindila kunihengela ;
Pakuhuhu awa wo ha
Pake Mlungu watanaye.

180

Lolaye atenga wake Kristo,
Watola ngakutonda
Hila hya Mlungu hyakuhyetu
Evangel yene nema.

Malowe gala Wakulota
Wagalingalilaye
Hino pa langa gawonike
Wagawalalikihe.

Gal' atendite Yesu Kristo,
Gal' ayuwine Mlungu
Wagalembite pa kalata
Aga galama hyaka.

Wapatukana, nambo Roho
Yumo awapulile ;
Tilola pa kalata yao
Kukema kwake Roho.

Watatu wa chihomo Yumo
Tinkuhe chikuhile,
Atikemite pa lawindu
Mwen' atimunkila,

PA EUKARISTIA YIHUHU.

196

Ambuya mtipikihe	Evangel yinu, Yesu,
Chakaka tichimanye ;	Ipite ku mihuku ;
Timmanye mwenga mwene	Tawoha tiyimbaye
Titama tiyii wana.	Ni tikahekelele.
Alleluya.	Alleluya.
Tinjimbilaye	Tinjimbilaye
Ambuya witu,	Ambuya witu,
Alleluya.	Alleluya.

202

Momo tenga kuchikama	Mlungu Atati, Mwana, Roho,
Sakramenti tiyinika	Akuhike, Alumbike,
Hya hihila hiyomwike	Hyaka hyoha timpeleke
Kuni hino hembe yene	Liyiniko ni malumbo
Nga pa mihio tihilola	Ni kutogolela kwake
Nambo pa kuyitikila.	Tihumbule pa mioyo.

203

Yesu muyili papipi, salamu,
 Higa yakwzelekeka ni Virgin
 Yila yahwile ni yila yahyukite
 Hino pahyetu nati tihimana.
 Yumo mnyahi, ni mwene ulongo,
 Mwana wa Virgin, tindilila mwenga.

Yesu liwanga la nkoha muluteta
 Machi ni mwahi kupita papamo ;
 Hila hinyahi hya mwenga tihipahe
 Woga wakatikamula pa kuhwa,
 Yumo mnyahi, ni mwene ulongo,
 Mwana wa Virgin, tindilila mwenga.

207

Papipi Mlungu muyii pani,	Hino papani tihikite
Ngakuwoneka nambo,	Chiliwi t chipala,
Ni woga tikuwilichimbo	Chiliwi chila Higa yinu,
Pa lungi pa mazabahu.	Chakunya Mwahi winu.

Wamanye wakuyitikila	Ambaya, mutiyangatile
Omo mutogolela,	Kunjuwanila wicho,
Ni kunywihi pa mahanga	Tiyende pa kuhekelela
Omo mlihila manna.	Mundila yitu pahi.

210

Mkohani witu Yesu,
 Muyii pa chiliwi echi,
 Muyii Bambo wa Kunani,
 Niyo hembe yikulungwa ;
 Yesu kwicho, ni lalino
 Yesu yumo, hyaka hyoha.

Kwicho pa msalaba mwenza
 Bambo witu mwakongite,
 Mang'ahiko gayomwile
 Hembe yitamaye momo ;
 Yesu kwicho.....

Hino apa mazabahu
 Muyii pani natu twoha,
 Kukuhika kwinu kuni
 Ni pa nkate ni pa mvinyo ;
 Yesu kwicho.....

Mkohani witu Yesu,
 Hyaka hyoha hembe yila
 Munjihila Atati winu,
 Yila tilangiha pani ;
 Yesu kwicho.....

Wan' adam Mlungu mwene
 Kukumbuka kuhwa kwinu
 Tichitende chitendile
 Mpaka hakiahikile.
 Yesu kwicho.....

211

Yesu Nkengelelo,
 Muyii mkati mwetu,
 Ni unyahi winu
 Tenga mutwilihe.

Mwenga tinchengula
 Kwa chihomo echi
 Momo tihimanya
 Hila hya Kunani.

Nema mtipikihe
 Chitogolanilo
 Woga, ni cha muni
 Tikakangamale.

Chonde mutamaye
 Pa mitima yitu
 Tikatame kwina
 Pakuyomokela.

MACHUWA GOHA.

247

Yesu Wakulima mnyahi,
 Mutigohe pa liwigi,
 Mwene makakara goha,
 Mutiwiki wicho kwinu.

Tindumbaye lyuwa loha
 Hyakupala tihitende,
 Ngati wala wa Kunani
 Wakukina titamaye.

Nkengelelo mwapeliki
 Umi winu tilamile,
 Ni mawoko ga chihomo
 Wakomile misomali.

Yesu Wakulima mnyahi,
 Mutiwule kuyuhwane,
 Pa ndila ya lukwali
 Niyendaye chiyendile.

Kuko mutilongolela
Tigehe kumbingilila,
Mpaka hakitihikile
Kuko kwa Atati witu.

248

Yesu Wakuhika,	Tenga tiyii wana
Mutiyanwanile	Wakulegeleka,
Nyimbo hya wakeke	Yesu, mutigohe,
Tindumbili mwenga.	Tikahowahowa.
Yesu mwenga Mhuhu,	Mukatikaniha
Mwene hikakala,	Hihakahu hyoha,
Mukatiyuyula	Tikutogotele
Apa tindumbila.	Zambi muwahile.

Apa mutikema
Tikuwingilile,
Tikayange nyata
"Yesu yatihike".

267

Akali ngakutitanka	Lilowe lyake tiyuwine
Wakukombola witu	Linyahi hpuputa,
Wakutiyimilila tenga	Kuhoka kwitu kukaniha
Kutama natu.	Kuwuha woga.
Maroho watu apulila	Unyahi wohi tiyii nawo
Utamo auwenda,	Ni apa tilemela
Minitima yitu kuhimana	Maholo gakuhalalika
Kutama momo.	Atipikiha.

Ee Roho Wakululalika
Kutonda myangatile,
Mitima yitu mhulalihe,
Mutame momo.

279

Lyuwa loha tiulumbe	Mhuka uhumila kuko,
Muchi wake Mlungu witu,	Machigake gayii umi,
Mwene atiwikingani	Nkengo awo wakulama
Nyumba hitu hya Kunani.	Kuoneka kupoleha.
	Lyuwa loha. . .

Linga loha la chikaya	Malaika wayimbiye
Lya zahabu lyakung'anya;	Akerubi, Aserafi;
Ndyango uyii wohu lulu	Atikem' Ambuya witu
Wakunyamba, wakunoga.	Natu tikokane kuko.
Lyuwa loha.....	Lyuwa loha.

Ni pikati pa chikaya	Uko njala niyo nywite
Kristo mwene awoneka;	Ni maholi pikitupu;
Malaika wamkwehaye	Woha waluluta muni
Ayii Bambo ni Ambuya.	Pakuhikingani kwao.
Lyuwa loha. . . .	Lyuwa loha..

284

Utamo winu, Bambo,	Kuko ni Ubatizo
Titogolela muni,	Apa ahika Roho
Chihoko chake momo	Kuyihilila wohu
Chipitilila choha,	Chihomo cha Kunani,
Utamo wa kuluwa	Tipala mazabahu
Wahika wandu winu,	Pakunogela muni
Ni mwenga muiii kuko	Magambo pala mwenga
Kuyuwanila wohu.	Papipi mtihikila.

Titogolela muni
Lilowe lene umi
Ni Iya kutipembeha
Pamang'ahiko goha.

Tinduw', Ambuya Yesu,
Tintogolele pani,
Kunani tinlolaye
Papamo ni Wahuhu.

285

Ambuya, Lilowe
Linu lilongoha
Wakuyitikila
Wakuhekelela.

Nani amanyaye
Lyakunyamba lyake
Iya Lilowe lila
Kwa wakulihinga ?

Apa wa mitumba
Watihyunguluta
Tikakangamale
Ni Lilowe lila.

Lipikiha chiha
Awa wayii umi,
Ni pa awo mkuhwa
Kupembeha muni.

Likahihikile
Lyuwa pa mahundi
Litimulikila
Lilangiha ndila.

Tenga timanyaye
Hya malango hyake
Tintogolalaye
Ni kutana kwinu.

294

Wahuhu pa mitumba
Wayili wa chihomo
Magambo Mlungu ammanyaye
Ni Kristo ayii kwao.

Ambuya apeleka
Umi ni kuliyeka
Atama nawo wan' Adam,
Bambo ni Ndingo wao.

Kwa wakuliheleha
Alilangiha mwene,
Ni pakuwen' utamo wake,
Wahuhu ahagula.

Ambuya, tikupala
Chihomo mtipikihe,
Ni ntima wakuhulalika
Utame hema yinu.

305

Nyitikila muni nenga
Mlungu yumo ni watatu,
Nyitikila nenga kuti
Mwana atamite mundu.

Chihowale changu nenga
Pa wakutachambulika,
Nenga nitachambulaye
Mahakahu gangu goha.

Mlungu yika apikiha
Umi woha ni makili,
Yombe yika nindogole
Mwene hikakala hyoha.

Kwa magambo yombe pela
Church liuhu niyinika,
Nipa hila lihiwula
Nihiyitikila muni.

Kukuhika timpikihe
Tenga nakamalaika,
Kwa Mlungu wa Kunani,
Atati, Mwana, niyo Roho.

315

Wahuhu Malaika woha,
Aserafi ni Akerubi
Yimbahuti, Alleluya,
Mwene makili wa Kunani
Mkwehayo woha ni chiheko
Alleluya, Alleluya, Alleluya,
Alleluya, Alleluya.

Maria Wakulumbilika
Kupita malaika woha,
Wapalungi pa malumbo
Ambuya witu anyongolo
Wa nema, mkuhihe Mlungu,
Alleluya etc.

Myitikilaye akaroho,
Ni akatati wa wawila,
Wakulota, Alleluya,
Akapostolo, akamboni,
Muyangalile ni kuyimba
Alleluya etc.

Natu tikwehe nyimbo hitu
Papamo hihyo hya Kuniani
Alleluya, Alleluya,
Kwa Mlungu Atati, Mlungu Mwana,
Ni Mlungu Roho yombe Mlinhu
Alleluya etc.

NYIMBO PA KUYIHILIKA MAWOKO.

Chonde Roho mtiyihile	Mtigulule wene zambi
Hyaulele hinu Saba,	Lwihi lwitu mmulikile,
Mtilimbihe, mtilamihe,	Nema, chiha, kuliyeke
Mwenga tintogololaye.	Hiwawinge wa mitumba.

Chonde Mwenga Roho Mhuhu,
Mutiwule kummanyaye
Mlungu, Atati, Mwana, Roho,
Tinchengule hyaka hyoha.

